

**Wednesday, January 7, 2026**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

### **COUNCIL OF MINISTERS**

Nizan khan Council of Ministers chu Chief Minister Pu Lalduhoma kaihhruiin Chief Minister Office Cabinet room-ah an thukhawm a. Chakma Autonomous District Council chungchanga Mizoram Larsap-in Council of Ministers thurawn hriat a duh chungchang an sawiho.

Larsap in Chakma Autonomous District Council kal dan chhui chiangtu tur Inquiry Commission thar din tha an tih leh tih loh thua Council of Ministers ngaihdan hriat a duh thu nizana thutkhawmah hian tarlan a ni a, Council of Ministers thukhawm hian, Chakma Autonomous District Council kalphung chhui chiangtu Inquiry Commission chu din tawh niin an report pawh an thehltut tawh a. hemi hnuah Autonomous District Councils pathumte kalphung zirchiangtu Study Team, Chief Secretary kaihhruaina hnuaiah din leh niin an report an thehltut tawh an ti a. Lawngtlai Deputy Commissioner pawhin Chakma Autonomous District Council chungchang report a thehltut tawhin Heng report pathumte chu a that tawh avangin A hranpaa Inquiry Commission din tharleh hi a tul tawh lovah a ngai a ni.

Nizana thutkhawmah hian Larsap in Chakma Autonomous District Council chu Governor's Rule a dah chhunzawm zel tur chi a nih leh loh thua Council of Ministers ngaihdan hriat a duh chungchang sawi niin Council of Ministers thukhawm chuan, Chakma Autonomous District Council-ah MDC member 20 a member 16 neia sorkarna siam thei Party an awm avang leh High Court-in sorkarna siamtir dan kawng zawng tura thurawn a lo pek tawh angin Governor's Rule-a dah lova sorkarna siamtir turin ngenna lo siam tawh mahse Governor's Rule-ah dah a ni tho an ti a, Governor's Rule term a zawh hnuah pawh sorkarna siam thei party chuan an dinhmun sawh sawn lova sorkarna an la siam theih reng avangin Governor's Rule-a thla ruk dang dah leh a tulna chhan engmah a awmlo tih sawiin CADC ah chuan sorkar ngelnghet tak a ding thei tih chu Council of Ministers ngaihdan a ni an ti bawk.



### **LADC**

LADC-a ZPM leh MNF sawrkar intawm Lairam Legislature Party atangin MNF an inhnukdawk a, Larsap in vawiina Lai Autonomous District Council a Chairman thlanna neih tura thu a pek chu nimin khan a sut.

Kumhluia LADC Inthlan anih hnuah Party mala Sawrkarna siam thei an awmluh avangin Sorkarna siam tumin hmalakna kalpui nghal a ni a, Congress leh MNF ten thawh dun tum hmasa berin, Congress in MNF nen an thawhdunna an chhu chat a, Congress leh ZPM in thawh dun tum lehin, ZPM Political Affairs Committee in thawh dun a remti lova, hemi hnu hian ZPM leh MNF chuan thawh dun tumin

Lairam Legislature Party dinin, an hruaitu atan ZPM Member Pu T. Zakunga an thlang a, kumhlui December 15 khan Larsap hnenah LADC-a Sorkarna an siam theih thu an thlen a, Larsap pawmpuina hi reitak nghah a nih hnu ah nimin khan MNF Gen, Hqrs chuan Larsap hnen ah Lairam Legislature Party atanga an inhnuhdawh thu an thlen a ni.

Larsap chuan nimin tlai lam khan Lairam Legislature Party atanga MNF an inhnuhdawh vangin LADC ah Sorkarna siam thei an awmlah avangin LADC chungchanga thutlukna a lo siam tawh, Protem Chairman ruat, LADC Session koh leh LADC Chairman thlanna neih tura tihte chu a sut vek a, chanchin buatsaihlai hian LADC ah tute nge Sorkarna siam dawn tih hriat theih a la nilo a ni.

Puantawh thin angin LADC ah hian Bial 25 awmin MNF chuan bial 8 lain, Congress in bial 7 an la a, ZPM in bial 6 la in BJP leh Independent ten bial 2 ve ve an la a, LADC ah hian Sorkarna siamturin Member 13 tal neih a ngai a ni.



## **SCHOOL RE-OPEN**

Mizorama zirna in hrang hrang ten vawiin khan Thlasik chawlh an hman hnu in sikul an kai tan.

Akashvani News thudawn danin School tinah buaina leh harsatna awm lovin tuang takin bul tan a ni a, sikul thenkhata pawl 10 leh pawl 12 exam tur te chu sikul lo kai tan tawhin ngawrh taka zirna kalpui a ni a, vawiinah hian pawl hniam ber atanga pawl sang ber thlengin zirna in an kai chhunzawm a ni.

Zirna in thenkhatah chuan vawiin hi school luh tan ni anih angin chawhma chung chauh school hawn a ni a, inhlanatharna neia bultanin zirlaite thu zawm tur leh school dan leh inkaihhraina te sawi thar leh in hmun thenkhatah erawh zirna kalpui tan nghal a ni bawk.



## **MIZORAM GEOGRAPHICAL DATA**

Mizoram Sorkar chhinchhiahna hnuhnung bera a lan danin, Mizoram chhunga district zingah Lunglei district chuan huam chin a nei zau ber.

Mizoram Sorkar chhinchhiah danin Lunglei district hi square kilometre 3685.25 a zau a ni a, hei hi Mamit district chuan dawtin, Mamit district zau zawng hi square kilometre 3048.25 ang a chhinchhiah a ni bawk. Mizoram chhunga district huam chhung zau pathumna ah Lawngtlai district chu a lang a, Lawngtlai district huam chin hi square kilometre 2424.75 a ni a, Aizawl district-in dawt leh in square kilometre 2213.5 a zau a ni a, hei bakah hian Champhai district huam chin square kilometre 1652.5, Saitual district square kilometre 1651.25, Siaha district square kilometre 1529.5, Kolasib district square kilometre 1492.5, Khawzawl district square kilometre 1088.25 bakah Hnathial district huam chhung chu square kilometre 851.5 ang a chhinchhiah a ni bawk.



## **MIZORAM CO OPERATION DATA**

Mizoram chhunga co-operative society awm zat chu chhinchhiahna hnukung bera a lan danin 1289 a tling tawh a, mi 50,286 co-operative society-ah hian inziak lut an awm.

Co-operative society hi Aizawl district-ah tam berin 550 a awm a, hei bakah hian Lunglei district-ah 244, Champhai district-ah 215, Serchhip district-ah 106, Kolasib district-ah 97 leh Mamit district-ah 85 a awm bawk.

Co-operative society-a inziak lut zingah Aizawl district-a inziak lut an tam ber a, Aizawl district-ah hian mi 20,432 inziak lutin, Lunglei district-ah mi 224 an inizak lut a, Champhai district-ah mi 215, Kolasib district-ah mi 97 bakah Mamit district huamchhungah mi 85 co-operative society-ah hian an inziak lut a ni.

Kan correspondent report i lo ngaithla ang.

### ***Voice Cast***

*Mizoram chhunga co-operative society zingah hian Zoram pum huap co-operative society 12 a awm a, heng state level co-operative society-ah te hian member a vai a belhkhawmin 2001 an awm a, state level co-operative society te share capital hi cheng nuai 1245 ang a chhut a ni bawk.*

